

EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA



Aukuso - Tesema

2026



Autalavou

TUSI AOGA AUTALAVOU
AOKUSO – TESEMA - 2026
FA’ASOLOGA O MATAUPU

- | <u>ASO /MASINA</u> | <u>MATAUPU</u> | <u>TUSI FAITAU</u> |
|-------------------------------|--|-------------------------------|
| 1. Aso Sa – Aokuso 02, 2026 | ----- “O le vala’auina o uluai so’o o Iesu” | -----Mataio – 4: 18 – 22 |
| 2. Aso Sa – Aokuso 09, 2026 | -----“E le o a’u , a o le Atua” | |
| 3. Aso Sa – Aokuso 18, 2026 | -----“Aganu’u “ (Fa’amatai) | |
| 4. Aso Sa – Aokuso 23, 2026 | -----“O le la’au e lē to’ulu ona lau” | -----Salamo - 1: 1 – 6 |
| 5. Aso Sa – Aokuso 30, 2026 | -----“Ia fa’aaogaina tatau taimi mo le Atua” | |
| 6. Aso Sa - Setema 06, 2026 | -----“O le Atua e tumau lava lona fa’amaoni” | -----Salamo 31: 1 – 23 |
| | (Aso Sa Talalelei) | |
| 7. Aso Sa – Setema 13, 2026 | -----“O amataga uma o le Atua” | -----Kolose 1: 1 – 10 |
| 8. Aso Sa – Setema 20, 2026 | -----“Aganuu “(Matai ma le Fa’amatai) | |
| 9. Aso Sa – Setema 27, 2026 | -----“O le Leona tagi poo le Leona Tupu | -----Amosa – 1: 1 – 15 |
| 10. MASINA O OKETOPA | -----“TAPENAGA MA MALOLOGA MO LE LOTU TAMAITI – 2026” | |
| 11. Aso Sa – Novema- 01, 2026 | -----“O le talanoaga i le pogisa” | -----Ioane – 3: 1 – 2/ 19: 39 |
| 12. Aso Sa – Novema 08, 2026 | -----“Aganu’u” (Afio’aga) | |
| 13. Aso Sa – Novema 15, 2026 | -----“Aganu’u” (Faiganu’u) | |
| 14. AsoSa – Novema 22, 2026 | -----“Loto fa’afetai ma fua mai” | -----Kolose – 1: 1 – 8 |
| 15. Aso Sa – Novema 29, 2026 | -----“ E lē uma i le oti le alofa” | -----Ruta – 1: 1 – 22 |
| 16. Aso Sa – Tesema 06, 2026 | -----“O le fa’aliliuga silisili ese a le Atua” | -----Isaia 7: 10 – 14 |
| 17. Aso Sa – Tesema 13, 2026 | -----“Tapenaga mo le Kerisimasi ma le Tausaga Fou” | |

TUSI AUTALAVOU
AUKUSO – TESEMA – 2026

ASO SA – AUKUSO 02, 2026 “FA’ATALATALANOAGA I LE TUSI PAIA”

MATAUPU – “O LE VALA’AUINA O ULUA’I SO’O O IESU”

TUSI FAITAU – MATAIO – 4: 18 – 22

FA’ATOMUAGA- Fa’amalo le folau i le mamalu o le Autalavou. Vi’ia foi le Atua ua tau manuia le fa’amoemoe o le Ekalesia Aoao e ala i lana Fonotele o le nei tausaga. Malo le usufono, fa’afetai le tauāta’i. Ae pei lava ona silafia, e fa’aauau pea a tatou galuega ma feau e pei ona vala’auina ai i tatou i le Ekalesia ma le talalelei e ala i fanau ma tupulaga. O tatou lava o so’o o le Alii mo lana fa’aolataga ma manuia fa’avavau mo tagata uma e o’o lava iā tatou tupulaga ma fanau. Fa’afetai ma ia vi’ia pea le Atua e fa’avavau. Fa’atalofa atu ai i le suafa mamalu o Iesu le Ao o le Ekalesia, i le nei vaega mulimuli o ā tatou galuega fa’a -Autalavou o le nei tausaga ua aga atu i lona taunu’uga.

O le tatou mataupu amata o lenei ‘afa mulimuli o le tausaga 2026, ua fa’aulutalaina atu o le vala’auina o ulua’i so’o o Iesu, a’o tatou aga’i atu i le Talalelei i le Aso Sa o lumanai’. O le fa’amoemoe o lenei fa’asoa, ina ia mafai ona a’oa’oina pea tupulaga ma iloa le ala na vala’auina ai ulua’i so’o o Iesu, o le nofoaga na tupu ai, ina ia mafai ona malamalama tupulaga i ni agava’a o i latou ia, ma a latou galuega ia feso’ota’i ai i le tatou galuega fa’aso’o o Iesu. E lē fou le mataupu pe afai e talanoa i so’o, peita’i, e fou pea manatu ma lagona e maua mai le Agaga, e saga matimati ai pea le soifua a’oa’oina o tupulaga ina ia mafai ona fa’aaogaina lo latou soifua i le vala’auina ma filifilia i le galuega a le Alii. Ou te taofi o le ā mafai ona a’oa’oina ai tupulaga ina ia fa’aaoga tatau agava’a i galuega ma taleni ua maua, e mulimuli ai ma tali atu i le vala’auina o i latou e fai ma so’o o Iesu, ae aua lava ne’i mamulu atu i ala o le tiāpolo ma tu’inanauga o le olaga.

SINA FESOASOANI MO LE TATOU MATAUPU

O nai manatu fa’atupu manatu i nai agava’a o le tagata e feso’ota’i ma le galuega fa’aso’o o Iesu. O le ā taumafai pea e fa’asoa mai le tala i le Tusi Faitau o lo’o fa’aaogaina.

1. E lē mafai ona fagota ma’i se isi.

O le mea mautinoa lea mo le tagata fagota, e lē mafai, lē mafai ona fagota pe afai ua gasegase. E lē gata e lē maua ni i’a o le faiva, ae matuā lamatia lava lona soifua malōlōina. E tatau ai ona saili ia atoatoa le malosi auā e lē o se galuega faigofie. E tatau ona malosi atoatoa le tino, mafaufau ma le agaga. Afai e atoatoa mea ia , ona mautinoa lea o le ā mafai ona alu e fagota ma fa’ataunu’u le faiva. E lē ‘asa lava se faiva ma se maumau, ae o le atoatoa o le malosi, o le ā maua ai i’a o le faiva, auā ua iloa metotia e fagota ai.

E fa’apenā uma lava le galuega a Iesu tupulaga, e tatau lava ona atoatoa le malosi o le tagata atoa i mea uma, ona manuia lea o le faiva ma maua agaga. Ia manatua e leai se galuega e mafai ona fai ma’i, auā o le ā leai se uiga e fai ai, o le ā le fua mai. E fa’apenā le fa’aaogaina o agava’a ma taleni ua iā te outou

tupulaga, ia malolosi i le tagata atoa, mo le talalelei a Iesu, ina ua avea ai outou ma so’o vala’auina o Iesu i lana galuega ma lana fa’aolataga.

2. Ia muamua fonofono upega ma tapena lelei mea fagota.

O le atamai fa’a- tagata faifaiva lea, e maua ai i’a o le faiva, pe ā lelei mea fagota, ma lelei foi upega o le faiva. O le ata foi lena o le galuega fa’aso’o o Iesu, e matuā mo’omia le tapena lelei o mea fagota mo le faiva fa’asoo ia maua agaga mo le Alii. O le galuega e amata mai lava i le lotoifale o le tagata fagota, ina ua mautinoa ua lelei tapena le faiva ma mautinoa o lo’o tapua’ia lona faiva e aiga ma nu’u ma tagata uma. Fai mai a le upu, “o faiva e tapua’ia, e a’e manuia. E tatau ona lelei upega ma ‘ofe e fa’aaoga, ma mea fagota uma e saunia ina ia maua i’a e tele.

3. E tatau ona tapena ni maunu lelei o le faiva.

Afai e lelei mea faigaluega o le faiva, e fesoasoani tele le lelei o maunu e tapena, ona mautinoa lea le maua o i’a o le faiva. O maunu i le galuega fa’aso’o, e fa’ataata i metotia e fa’aaoga e le so’o e saili ai agaga mo le aiga o le Atua. Mo Iesu ma lana galuega fa’aso’o, o le tautai po’o le faifaiva i agaga o tagata mo le malo o le Atua. E fa’apena foi tatou i le galuega a le Atua, a sa’o ma lelei maunu po’o metotia tatou te fa’aaogaina i le galuega, o le ā to’atele foi tagata e tosina ma gaua’i mai loto i le galuega o lo’o faia. O fa’apefea mai oe le tama ma le teine talavou o le so’o vala’auina o Iesu i lana talalelei ma lona malo? O sa’o maunu po’o metotia o lo’o e fesoasoani ai i isi tupulaga, ina ia gaua’i i le ala o le Alii?

4. Ia masani le tagata faifaiva i le gataifale o le ā fagota ai.

E tatau ona iloa ma malamalama le tautai i le ogasami o le ā fagota ai, ina ne’i taumate le faiva pe tua ma ni a. O le lagona foi lea i le galuega fa’aso’o a Iesu, e tatau ona e masani muamua ma malamalama i le si’osi’omaga o le galuega, ina ia maua le to’a i lau galuega. Ia masani ma tagata lautele, ona tupu lea o le mafanafana o le mafutaga, o le ā faigofie ai ona talanoa ma fa’asoa i mea lelei uma ina ia ta’uleleia le galuega ma manuia.

5. O le alu e fagota i le sami, e taumate lava le toe foi mai i uta.

E to’atele lava tautai ua masani ma le sami ma aga a le tai. Peita’i, e leiloa lava mea tutupu. E fa’apena le galuega a le Atua ma le talalelei. O le so’o ua ofoina le ola mo le galuega a le Atua, e tatau ona alu ma le loto atoa. Alu ma le fa’atuatua i le Atua ia maua mai ni agaga o tagata mo le Atua ma lona malo. E i’u lava ina uma ai le ola i le galuega, ae ua faia lava mea uma mo le Atua e ona le galuega. Ae mautinoa lava e a’e malo le faiva auā o le tautai o le Atua e ou le galuega.

6. O le alu e fagota e tatau ona mata’alia i le tau. E tatau ona mataala pe ā timu pe la foi. E tatau foi ona mata’alia i taimi o le souā ma le malū o le sami, ia ola saunia i taimi uma.

E fa’apena le Talalelei a le Atua, e lē sologa lelei pea aso o le galuega. E i ai taimi e souā ai le sami i manatu o tagata. E i ai foi taimi e lelei ai. O le mea sili ona taua i’inei, o le tagata fagota po’o le so’o, ia mata’ali ma manino lana va’ai i ala e ono sao ane ai le fili.

7. O le alititai o lo’o i ai le penina (pearl)

E seāseā ona maua ese tautai lenei ma’a tāua taugatā mai le sami. A’o le uiga atoa lea o le finagalo o le Atua, na tu’ua ai e Iesu le mamalu ae afio mai, ia tatou iloa ona saili penina tautele ma anagatā o le galuega tala’i. O le galuega a Iesu, o le tele ia o penina na maua ai. (agaga o tagata). O le fa’amoemoe foi lea o le avea ma so’o, a maua se agaga ma liua se loto i lau tala’iga fa’a -talalelei, o le vi’iga lea i le Atua e lē aunoa.

O nisi ia o agava’a taāua ua manatu e fai ma fesoasoani i le tatou fa’asoa. A e talitonu lava o le a tele nisi agava’a ma metotia o le ā fa’asoa ane e le Autalavou.

NAI FESILI FA’ATUPU MANATU

1. O a ni agavaa o le fai faiva I nei aso e fesootai ma le galuega faasoo o Iesu?
2. O faapefea mai lou faiva talai I nei aso o suiga o le lalolagi?
3. Ua liua se agaga o se tasi talavou ona o lau tala’iga fa’aso’o?
4. O ā ni suiga o le tau i lau tala’iga, e tataua ona e mata’alia ai i nei aso?

UPU FA’AI’U – Tatou taumafai ia ola ni agaga ia i tatou, ae le o le solomua iā i tatou ona fa’asesē agaga.

Manuia le fetufaaiga i lenei afiafi

////////////////////////////////////

ASO SA – AOKUSO 09, 2026 “SA’ILI’ILIGA FA’ALAU’ITELE I LE TUSI PAIA”

MATAUPU – “E LE O A’U A’O LE ATUA”.

FA’ATOMUAGA – O le tasi lenei o fuaitau e masani ona gagana ai le atunu’u, aemaise lava pe ā ma’ea se fa’amoemoe tāua ma lelei na fa’atinoina. O upu o lo’o momoli mai ai le agaga fa’afetai i le Atua ona o lona alofa ua mafai ai ona fa’ataunu’u mea uma i le lelei atoatoa. O le mataupu la lenā o le nei afiafi, o le toe fa’amanatu o ia upu ma uiga i loto ma mafaufau o tupulaga, le tāua o le fa’afetai ma fa’amuumua le Atua i mea uma ma le olaga. Aemaise lava ia aua ne’i faia ona o le va’aiga a tagata, ia pe fai foi ona ua masani ai, ae ia lagona i le loto le sa’o, ma faia ai ma le loto atoa mea lelei uma mo le viiga o le Atua.

O NAI TUSI MAI LE TUSI PAIA E FESOASOANI MO LE MATAUPU.

1. **(Kenese: 45: 1 – 8).** O le tala i le ituaso na fa’ailoa ai e Iosefa lona tagata i ona lava uso, o e na latou fa’atau ese o ia i tagata Mitiana. (Kenese 27: 28). Na lagona e le ‘au uso le popole ina nei tau ai e Iosefa le leaga o le latou gaioiga sa faia iā te ia. Peita’i, ua manino lava i upu a Iosefa lona loto fa’amagalalo. Ua ta’utino foi Iosefa, o le Atua lava na ‘auina mai o ia i Aikupito, **“auā na ‘auina mai a’u e le Atua e muamua iā te outou e fai ma fa’aola.”(f: 5).** O le fa’amanatu mo le Autalavou, ia aua nei tatou fetu’u i auala faigatā na tatou ui mai ai. O ā lava faigatā e feagai pea ma i tatou i aso uma, o le fa’amanatu a Iosefa, ia ,manatua le Atua. Ia tatalo i le Atua e saunia auala e liua ai ia tigā e fai ma mea suamalie i le ola, pe afai tatou te maua fa’amanuiaga.
2. **(Tanielu – 22: 27 – 28).** E le’i galo iā Tanielu le meaalofo mai le Atua ua iā te ia, o le fa’amatala miti. Fai mai Tanielu, a’o i ai le Atua i le lagi, o le na te fa’aalia mea ua lilo. Ua ta’utino lava Tanielu, e lē mafaia e

aitu ma tagata popoto o Papelonía ona fa’ailoa ni miti, **ae ua na o le Atua** o i le lagi. O se feau fa’amanatu ina ia aua nei galo le Atua o lē na aumaia le poto ma le atamai i le tagata.

3. (**Kenese - 8: 20 – 22.**) O taulaga na faia e Noa ina ua ulufafo mai le va’a. O fa’ailoga o le loto fa’afetai i le Atua ona ua matūtū le ‘ele’ele mai le lolo. O le taulaga ua fa’ailoa ai e Noa, o le saogalemu ma le ola ua maua ina ua mavae le lolo, e lē o sona malosi ma sona atamai na fau ai le va’a, a’o le alofa lava o le Atua. O fa’atinoga tatou te faia, e mafai ona fai ma fa’ailoga o mea o lo’o tatou loto iai. O le taulaga ua faia e Noa ma lana fanau, ua fai ma fa’ailoga o lo latou talitonu, o le ola ina ua mavae le lolo, e lē ona o i latou, a’o le Atua i lona alofa mai. Ia fai ni tatou fa’atinoga ina ia manogi lelei i le fa’afofoga a le Atua e pei ona faia e Noa ma lana fanau. – (f: 21)

FA’ATINOGA O LE MATAUPU -

1. Tu’u le avanoa i le Autalavou e sa’ili’ili ma fa’ailoa ni tala o le Tusi Paia, o lo’o fai ma molimau o ia upu – “E lē o a’u a’o le Atua”
2. Saili ni fa’aupuga mai le tusi o lopu o lo’o iloa ai le fa’atuatua o lopu i le Atua, e ui o lo’o feagai ma le ma’i papala. (Tali – lopu 1: 21). E lelei ona sa’ili’ili pea le Autalavou muamua i ni nai minute pe latou te maua le fuaiupu lena, a’o le i fa’asoa i ai lau Susuga a le ta’ita’i)

UPU FA’AIU – O le mataupu o lenei afiafi, o se toe fa’amanatu i le soifua tautua ma le ola auauna i le Alii. Ua manatu e lelei pea ona totō i loto o tupulaga le tiute lea a’o aga’i ane e tautua i le Ekalesia i tofiga e pei ona auauna ai i tatou ua matutua. O le fa’amoemoe ina ia aua nei galo iā tatou tupulaga ma fanau le alofa o le Atua ma lona silisili i mea uma lava. O le Atua o le pogai o mea lelei uma. O ā lava fa’amanuiaga ua maua i tofiga ma vala’auina, ia manatua – **E lē o tatou, a’o le Atua”**

Manuia le fa’asoa, fa’afetai le fa’amalolosi

////////////////////////////////////

ASO SA – AOKUSO 18, 2026 – “AGANU’U” (Mataupu fa’aauau mai le ‘afa muamua o le tausaga)

MATAUPU – ‘O LE FA’AMATAI” (E fa’avavau aiga)

FA’ATOMUAGA – O le fa’aauauina lenei o le tatou fa’asoa i le mataupu e fa’avavau aiga e pei ona i ai i le ‘afa tausaga muamua ua mavae. O le mataupu i le **fa’amatai**, e lē fou, peita’i, e lagona lava ina ia taumafai pea se sao mo nai tupulaga o aso nei i le malosi o tu fa’a- Europa, ina nei goto uga atu ai ma lo latou iloa i lo tatou tupu’aga mai le amataga, ma le gasologa o aiga uma i tu ma agaifanua mo le lumana’i. Ua na o nai manatu faigofie o tau aoao mai e fa’amaite atu, ae ua inā le silafia ma le iloa e fa’atonutonu folau ai i le tatou mataupu. Ma fa’amanino ai i tupulaga fa’avae o aiga.

O le mataupu i le fa’amatai (system), e tataua lava ona malamalama muamua i tatou i le uiga o le upu matai, o ituaiga matai, tulaga ma va fa’ale- matai, ma o latou tiute fa’apitoa auā le tausiga o aiga ma nu’u. E ao lava ona silafia, e soālaupule e le ‘auaiga le filifiliga, ma uiga fa’apitoa e agava’a ai se tasi e fai ma matai e tausia le aiga, le nu’u, aemaise ai o le va i fafo, ia manuia tagata uma ae le na o nisi. E iai foi tiute tausimea fa’apitoa o le matai i le tausiga o le nu’u, tainane foi le Ekalesia o lo’o nofo auauna iai.

O NAI UPU I LE FA'AMATAI UA FA'ALILIUINA INA IA MALAMALAMA AI TUPULAGA.

1. Aganu'u -----customs practiced throughout Samoa
2. Agaifanua -----customs specific to the village/district
3. Agava'a -----the most suitable/the best fit
4. Aigātupu -----Royal families
5. Ali'i -----a paramount chief
6. Ali'i sili -----an ali'i of highest status
7. Ali'ita'i -----highly respected
8. Ali'i atuāpa'usisi -----the matai respects and follows the wishes of the family
9. 'Autasi -----to be in unity
10. Fa'ae'e -----to be bestowed the matai title
11. Faleupolu -----orator/talking chief
12. Faigānu'u -----activities performed by the village
13. Fa'alupega -----honorifics
14. Fa'amalumaluga -----to be under one's protections
15. Faletama -----children of the same clan
16. Fa'aaloaloga -----respectful
17. Fa'atula'i ma le nu'u -----banished from the village
18. Fa'atulafonoina -----to make it legal
19. Fa'auile'ula -----a chief releasing his matai/duties to ones of his children.
20. Fili -----select/choose
21. Itupaepae -----clan
22. Mapuitiga -----to suffer.
23. Matāfaioi -----specific role and responsibilities
24. Mapuitiga-----to suffer
25. Matai -----a chief who sets good examples for his family
26. Mata'i-----to closely observe one's behavior
27. Meatotino-----something that belongs to someone
28. Nofo/saofai-----bestowment of chiefly title
29. Pitovao-----a chief who is aged and cannot participate
30. Pou o matuā-tala-----this post is designated for the highest paramount chief
31. Soālaupule -----to deliberate
32. Tatala le suafa-----all family members are eligible to receive the title
33. Toe 'ulutaia-----elderly chief/orator
34. To'oto'oalii-----a matai who holds both a paramount and an orators title
35. Tula -----one of the highest rank/status
36. Tulāfaleali'i-----an orator of highest rank/status
37. Tu'ua -----an orator of highest status chosen as leader of the village.
38. Vaiali'i -----paramount chiefs of lower rank/status
39. Vaitulāfale -----orators of lower rank/status.

TOE MANATU – E malamalama le 'Autalavou i le tele o upu ua tu'uina atu e uiga i le upu matai ma ona tiute tau ave. Fa'amolemole ia matuā fa'amanino lelei i tupulaga le 'ese'esega ma tiute tauave o matai ina ia le nunumi ai. O le mea lea e faigofie pe ā fa'asoa le tupulaga ma fa'amalamalama nai upu ia mo i

latou. Aua foi nei taofia le fa'alauteleina i nisi vaega ua le maua atu i'inei, auā e 'ese'ese lava nu'u ma o latou talitonuga, a'o le mea tāua ia iloa e tupulaga le nonofo ai i totonu o aiga, na anava tausī i aso uma.

Manuia tele le fa'asoa, fa'afetai le onosa'i.

////////////////////////////////////

ASO SA – AOKUSO 23, 2026 “SU'ESU'EGA I LE TUSI PAIA'

MATAUPU – “O LE LA'AU E LĒ TO'ULU ONA LAU”

TUSI FAITAU – SALAMO – 1: 1 - 6

FA'ATOMUAGA – O le fesili? E i ai se la'au e lē to'ulu ona lau i le olaga lenei? O le tali, e leai. O la'au uma lava e i ai le taimi ma le aso, e mamae ai ona lau ma fa'asolo ina mate. Peita'i, o le tagata e fa'atuatua i le Atua, o le tagata lena ua fa'atusa i ai le la'au e lē to'ulu ona lau. O le fa'amoemoe lea o lenei sa'ili'iliga, ina se'i toe fafagu pea i tupulaga le tāua o le ola fa'atuatua i le Atua, auā e lē gata e manuia ai le olaga i le tino nei, ae 'ave'avea'i manuia na auā e tumau e fa'avavau.

O SINA FESOASOANI MO SA'ILI'ILIGA –

O le Salamo 1, o lo'o fa'atāua ai le sa'o o le filifiliga i le auala tonu e savali ai le tagata soifua. A savali i ala o le Atua e manuia, ae a savali i ala o le fili ma le tiapolo e i'u i le malaia. O le uiga lea o le fa'a – amuia a le fai Salamo: “Amuia le tagata e lē savali i le filifiliga a e amio leaga” Aua e maua e ia le manuia o le Atua.

O NAI MANATU E FA'ATATAU I LE SALAMO 1

1. Fuaiupu 1: ***“Amuia le tagata e lē savali i le filifiliga a e amioleaga, e lē tu foi i le ala o e agasala, e lē nofo foi i le nofoa o e tauemu.”***

E tolu galuega fa'atino o lo'o taua i le Salamo, O le savali, o le tu ma le nofo. O tatou o tagata fai filifiliga. Tatou te savavali solo ma va'ava'ai ina ia maua se filifiliga tonu e fa'amalieina ai o tatou loto. E ta'ia loa le va'ai i se mea e manaia, ona tu lea e va'ava'ai atili ma toe iloilo itu uma, ina ia fa'amalieina ai le loto. A fa'amalieina le loto, ona fa'atau lea ma 'ave i le fale, ma ua fai mo i tatou lea mea i aso uma. Ua tatou nonofo fa'atasi ma tausī fa'apelepele i ai. E manumanu ma avaga pea i ai le loto i taimi uma. E fa'atino foi i ai galuega lelei uma ina ia aua lava ne'i vave fa'aleagaina. I le manatu o le fai Salamo, amuia i tatou pe afai o tatou te lē o filifili e savavali i ala o e amioleaga. Amuia i tatou pe afai tatou te lē o tosina o tatou loto i le leaga. Amuia i tatou pe afai tatou te lē o nonofo ma aumau ma le tiapolo i aso uma.

2. Fuaiupu e 2: ***“.....ae naunau o ia i le tulafono a le Alii, e mafaufau foi o ia i lana tulafono i le ao atoa ma le po.”***

O a tulafono a le Alii? – O tulafono e 10, ma a'oa'oga a le Tusi Paia.

O a tulafono a le tagata soifua? – O tulafono a le Alii, fa'atasi ma tulafono o lo'o lima ta'ita'iina ai lona ola lelei i le soifuaga lenei. I le manatu o le fai Salamo, pau lea o le auala e maua ai le ola saogalemū ma fa'asaoina ai le tagata mai ala o le tiapolo, po o le filifili i ala o e amioleaga. O le

naunau i tulafono a le Alii atoa ma le manatunatu ifo o le tagata lava ia i tulafono o lo’o ta’ita’iina lona ola i aso uma, o le ala tonu lea e tupu olaola ai le tagata i lona fa’atuatua atoa i le Atua. Ia manatua lenei mea tupulaga, e tãua tele foi le tausī ma usita’i i tulafono i le olaga nei, auā o tulafono uma, e mo le lelei o le tagata soifua. O le naunau e a’oa’oina ma ola i tulafono a le Alii, e maua ai le ola ma le ola e fa avavau lava. A’o le tausī o tulafono i le olaga lenei, e saogalemū ma sagatonu ai le naunau i tulafono a le Alii, ma manuia atili ai lava.

3. Fuaiupu e 3. “O ia foi e fa’apei o la’au ua totō i tafatafa ane o vaitafe,e lē to’ulu foi ona lau, e manuia foi mea uma na te faia.”

Ua tatou iloa le ‘ese’esega o le la’au e toto i tafatafa o le vaitafe ma le la’au e leai se vai e o’o i ai. E fa’apenā le olaga o le tagata fa’atuatua. O le vaitafe, ua fa’atusa i Afioga a le Alii ma tulafono a le Alii e fai lea ma vai e fa’asūsū ai le ola o le tagata soifua ona maua lea o fa’amanuiaga e pei ona ta’ua: **“e lē to’ulu ona lau, e manuia foi mea uma na te faia.”** E pei ona ta’ua i le amataga, o le to’ulu o lau o se la’au, o le fa’ailoga lea e iloa ai ua fa’asolo ina mate lea la’au, pe ua uma foi lona lelei. E i ai la’au e to’ulu o latou lau, ona toe fotu lea i se isi malosī fa’afouina. Peita’i, o le tagata e pipi’i ma tumau i le Atua, e leai se taimi e vaivai ai, e maua e ia le malosī fa’asolo atoa mai le Alii.

4. Fuaiupu e 4. “E lē fa’apea o e amioleaga, ae pei o ‘aputi o saito i latou ua lelea i le matagi.”

E lē tumau ni tagata amioleaga, auā e lelea i latou e fa’apei o ‘aputi o saito. A’o le tagata amiolelei, e tumau pei o le la’au e lē to’ulu ona lau. A’o le tagata amioleaga, e sau le aso e mamae ai ona lau ma i’u ina mate. A’o le la’au e mate, e leai lava se isi mea e fai i ai, e lia’iina ma lafoa’i i le afi.

5. Fuaiupu e 5: “E lē tutū foi tagata amioleaga i le fa’amasinoga, e lē tutū foi tagata agasala i le fa’apotopotoga o e amiotonu.”

Pei a o’o mai le i’uga o mea uma, e tūtūla’i lava le tagata ia e tali i ana amioga na faia i lalo nei. O le fa’amasinoga o lo’o ta’ua, o lo’o fa’asino i le fa’amasinoga tonu a le Atua i le i’uga o mea uma. O le fa’amasinoga e fa’aulufale ai le tagata amiolelei i manuia o le Atua. A o e ua naunau pea e amioleaga i le olaga, e lē mafai ona manumalo i lea fa’amasinoga, auā o i latou lava o tagata amioleaga.

6. Fuaiupu 6: “Auā ua silafia e le Alii le ala o e amiotonu, ae fano lava le ala o e amioleaga.”

O le silafaga ati a le Atua, e lē sao ai se tagata. Po’o le a foi le lelei o au ‘alo ma saunia lelei au pepelo, e te lē lilo ai lava. O mea uma tatou te faia i lalo nei, e silafia uma e le Atua. O mea uma foi na e tolaulau i le fa’amasinoga o e amiolelei ma e ua amio leaga. Ae ua manino le i’uga o tagata uma, e manuia e amiolelei, ae fano lava e amio leaga.

FA’ATINOGA O LE MATAUPU:

1. Ia vaelua le Autalavou, ona fa’asoa lea ma sa’ili’ili i ni uiga o parakarafa e lua o le Salamo 1.
VAEGA 1. Salamo 1: 1 – 3. VAEGA 2. Salamo 1: 4 – 6

FESILI FA'ATUPU MANATU:

1. O ā ni fe'au fa'ale – agaga e mafai ona tatou maua mai le faitauina o fuaiupu ta'itasi o le salamo 1?
2. O le ā se a'oa'oga tāua e mafai ona fai ma au ta'utinoga e toe amata ai lou soifua fa'ale -agaga ua maua mai le mataupu, O le la'au e lē to'ulu ona lau? Manaia sia fa'amanatu.

UPU FA'AI'U: AOTELEGA

O le la'au e lē to'ulu ona lau, ua fa'atusa i ai le tagata e savali i ala o le Alii. O le tagata fa'atuatua, o le tama ma le teine talavou fa'atuatua moni i le Atua e lē faia'ina i se mea e tasi, e maua e ia le manuia mai le Atua. Ia lafoa'i i ala o le fili ma le tiapolo e fano ai, ae savali i ala o le Alii, ona maua lea o manuia fa'apei o le la'au e lē to'ulu ona lau.

Manuia tele tupulaga, malo le sailiili.

////////////////////////////////////

ASO SA – AOKUSO 30, 2026. “SU'ESU'EGA I LE TUSI PAIA”

MATAUPU – “IA FA'AAOGAINA TATAU O TATOU TAIMI MO LE ATUA”

TUSI FAITAU – MATAIO – 6: 25 – 33

LUKA – 10: 38 - 42.

EFESO – 5: 15 - 17

AUTU – “Ia fa'amanatu atili i tupulaga le tāua o le fa'aaogaina tatau o tatou taimi mo le vi'iga o le Atua, ae lē na ona fa'afiafia ai tatou. Aemaise ai, ia mautinoa e tupulaga ona fa'aaoga tatau aso o le olaga mo le viiga o le Atua. E lelei ae amata le su'esu'ega i le taliina o nai fesili ia, e tatala ai le mataupu.

1. O a au mea e masani ona fai i aso ta'itasi?
2. E fia itula o le aso e tasi?
3. E fia itula o le aso e te fa'aaogaina i mea nei?
- a. **galuega. e. taalo. i. faitautusi. o. ai ma inu.**
4. E i ai ni taimi e te mafaufau ai i le Atua.?
5. O le a le telē o lou taimi e te fa'aaluina i le facebook ma talanoaga i isi talavou?
6. E fia ni itula e te fesoasoani ai i nai ou tei po'o ou matua foi i nisi feau.
7. E i ai se itula ua e fa'aaogaina mo le lelei o se isi tagata?
8. E fia ni taimi e tapua'i ai lou aiga i le Atua?
9. E fia ni itula ua e iloa ua maumau i aso ta'itasi o lou olaga?
10. O le a le finagalo o le Atua i le fa'aaogaina o o tatou aso i le olaga nei?

O fesili faigofie ia e tatau lava ona fa'amaoni ona tali i ai tupulaga, ona faigofie lea ona malamalama i le uiga o le mataupu ma lana feau. E a'oa'o mai i tali o fesili ia pe afai e fa'amaoni ona tali, o le a tatou iloa ai le tele o taimi o tupulaga ua fa'aaogaina lē tatau i mea fa'afiafia o le olaga, ma ua tatou va'aia ai e foliga e lē o afaina ia i latou. Peita'i, e tatau ona tatou a'oa'oina le mataupu i sona tulaga aoao tetele mo tupulaga, mai le olaga o aso uma ma fesili ifo i le tali mo le fesili e 10, ona iloa loa lea o le mea tonu o lo'o paū i ai le fa'amamafa a lea talavou ma lea talavou i aso ta'itasi o lona olaga. O nei aso ua lē faigofie ona lagona e tupulaga, peita'i, o le iloa o le fa'aaogaina o ona aso ma taimi mo le vi'iga o le Atua, o le alu ese foi lea mai le tiapolo ma ana 'au ua lē malōlō i taimi uma. Fa'apefea la ona iloa se talavou o lo'o fa'aaogaina tatau aso o lona olaga mo le vi'iga o le Atua?

SINA SA'ILI'ILI I LE TUSI PAIA E UIGA I LE MATAUPU. (FESILI E 10)

1. EFESO – 5: 15 – 17

F: 15 – O a ni mea tetele ua ta'u mai ia i tatou i lenei fuaiupu?

(ola fa'aeteete, savavali ma le fa'autauta, aua le fa'avaleaina i tatou e tagata, ia ola popoto i mea lelei)

F: 16 – Mafaufau loloto i lenei fuaiupu, o a mea e ao ina tatou faia?

F: 17 – Pe le o le mea tonu ea lea e ao ina tatou saili ma ola aga'i i ai, **“o le finagalo o le Atua”**

2. MATAIO – 6: 25 – 33.

Pe afai ua ta'u mai e Iesu ia i tatou, “aua tatou te popole i mea tatou te a'ai ai ma lavalava. Po'o lona finagalo ea, ia aua tatou te galulue? O le a se uiga ia i tatou tupulaga o ia fetalaiga a Iesu?. Se'i mafaufau loloto ma fa'atalanoa le fuaiupu e 33 mo se fesoasoani i tupulaga.

3. LUKA – 10: 38 – 42.

Po ua le fiafia ea Iesu i galuega o lo'o faia e Mareta? Pe le tataua ea ona i ai nisi e saunia ni mea'ai mo i tatou? Ae aisea ua sili ai le filifiliga a Maria nai lo'o Mareta? Atonu po ona ua tu'ua e Maria nisi o ana galuega, ae alu ane e fa'alogologo ia Iesu ma lona finagalo.

Pe le o fa'apea i tatou tupulaga, ona o le tele o a tatou feau ma mea fa'afiafia o le olaga, ua leai ai se taimi tatou te fiafia ai i le lotu ma le Autalavou. Ua sasao malosi ai le le fia i ai i ni tapua'iga fa'ale-aiga i le afiafi, ona o ta'alogaga ma isi mana'oga. Ua atagia mai i le pisi o nisi tupulaga i aso nei, ua matua mamao lava ma le falesaga, ma ua le maua foi se taimi i aiga se'i a'oa'o ai e matua le tatalo ma le amio. Ua leo malie lava le pese masani a nisi o tupulaga ua leai se taimi mo Alii, ona o le tele o le pisi. Pisi i le a?

FEFA'ASOA'AI I FUAIUPU IA:

FUAIUPU – 41 – 42: “A ua tali atu le Alii ia te ia (Mareta), “Mareta e, Mareta e, ua e popole ma ua pupu lou loto i mea e tele, a'o le mea lava e tasi e ao ina ia maua,ua filifilia foi e Maria lea mea lelei, e le ave'eseina ia te ia.” (Se'i faitau ma manatunatu lelei i upu ia po'o le a se lagona o le a mafai ona tupu a'e i tupulaga ona fa'asoa lea i ai.).

O le mea mautinoa, i le fesoasoani a le Agaga Paia a'o faitau ma manatunatu i ia upu, o le a mafai ai ona tatou iloa le mea moni ua finagalo ai le Atua tatou te faia. O le a mafai ona fa'ailoa mai e le Agaga Paia ia i tatou pe fa'apefea ona fa'aaogaina tataua o tatou taimi mo lona vi'iga.

TOE MANATU – O tupulaga talavou ma tatou uma, o tagata faigaluega a Keriso. O ia o lo tatou Matai ma le pule o le galuega. Ia tautuana tupulaga, e le na o le taimi e te tapua'i ai i le Alii e iloa ai ua e galue mo le Alii. E le na o le taimi foi e te faigaluega ai. Ia manatua, o taimi uma o lou ola i le olaga nei, tatou te galulue ai mo le vi'iga o le Atua, i so'o se vala'auina. Ia silasila i lau fa'amuamua ma lau fa'amamafa, ina n'ei mamafa itu tasi i le tino, ae galo ai le finagalo o le Atua ma ona manuia e fa'avavau e mulimuli mai ia i tatou.

Nai fesili fa’atupu manatu”

1. Fa’amata o le ā sau silasila ifo i ate oe lava ma le fa’aaogaina o ou taimi mo le Alii ma lona vi’iga?
2. Aisea ua tele ai ina fa’anoanoa le i’uga o olaga o nisi tupulaga i aso nei.?
3. Fa’apefea ona tatou iloa se tama ma se teine talaqvou e fa’aaogaina tatau aso o lona olaga mo le Alii?
4. O ai ua fa’atamala, o matua po’o le talavou lava ia?

MANUIA LE AFIIFI

////////////////////

ASO SA – SETEMA 06, 2026 – “SU’ESU’EGA I LE TUSI PAIA” (Aso Sa Talalelei)

MATAUPU – “O LE ATUA E TUMAU LAVA LONA FA’AMAONI”

TUSI FAITAU – SALAMO 31: 1 - 23

FESOASOANI MO LE MATAUPU:

O se tasi lenei o natura poo uiga o le Atua ua faaalua ai o ia lava o le Atua moni e to’atasi. E ta’u loa le fa’amaoni o le Atua, o lona uiga e moni ma atoatoa, e fa’atuatua e ona tagata e matata’u ma alolofa iā te ia. O le Salamo lenei, o lo’o fa’amatalaina ai le loto atu o Tavita i lona Atua ma le lē masalosalo. Po o le ā lava le fetuleni mai o faigata ma lutia ai lona ola i puapuaga, aemaise ai lona lava ola lamatia i lo lā va ma le tupu o Saulo, ae e le’i avea ia mea e pupuni ai le loto o Tavita mai le pipi’i atu pea ma le fa’amaoni i ona tagata, aemaise i le taimi e sulu atu ai le tagata mo se lavea’i. O le vaega muamua o lana Salamo (ff: 1 – 6), o lona loto atoa e sulu atu ai i le Atua mo se lavea’i mo ia. Ia alofa ma fa’afofoga mai, lavea’i ma fa’aola mai, aua ua na o ia e mautinoa e malu ai lona ola. O le vaega e soso’o ai, (f: 7 – 8), o lona loto fa’afetai atu i le Atua ona o le tali mai ma le fa’afofogaina o lana aio’iga. O le fa’ailoga o le Atua fa’amaoni, e moni lona alofa. Ona toe aio’i foi lea o ia ma tu’u atu i le Atua lona ola ina ia lavea’iina ai totonu o puapuaga. Ua ia mautinoa a aunoa lava ma le Atua na te le mafaia lava se mea e tasi (ff: 9 – 18).

Ona soso’o foi lea ma lana fa’afetai e momoli atu ai lona loto atoa i le Atua (ff: 19 – 23), ona o le tumau o lona fa’amaoni e le liliu i le tagata puapuagatia, e mana’omia moni lana fesoasoani. Ua ia fa’ailoa atu ai i le lalolagi uma, o e matatau i le Atua, ina ia alolofa ma fa’amaoni e tali atu i le alofa mai o le Atua ia i latou. O le lagona o le tagata ua o’o i le loto ma le agaga le moni ma le fa’amaoni o le Atua, e ala i lona alofa ma lona manatu mai i lana tagata na fai. E fa’apena se lagona o lenei mataupu, e tupu le fa’atuatua i le taugologolo. O le fa’alogo pea i tala e uiga i le Atua ma lona agalelei, e tupu ai pea lo tatou ola fa’atuatua ia te ia ma le lē masalosalo. O i’ina tatou te lagonaina ai pea le moni ma le fa’amaoni o le Atua, o lo’o fa’aali mai pea mo i tatou i taimi uma ma aso uma. Ae ao foi ona o tatou tali atu i le loto talitonu e ala i le usita’i, fa’alogo, amio lelei ma le tele o uiga lelei uma e fa’aalia i totonu o ō tatou aiga ma so’o se mea tatou te iai.

O le fa’aaliga o le fa’amaoni i le finagalo fuatia ifo o le Atua na fa’ailoa mai i lona alofa fa’aola mo le tagata agasala, e ala i lona fa’atau ese mai oi tatou ai le pule a le agasala i le soifua paia o Iesu Keriso lona Alo pele e to’atasi. Na ia maliu tiga ai i le satauro e ala i lo tatou vala’au pea ia fa’asatauro iā te ia. O lona toetu ua toe fausia ai i o tatou loto e ala i le mana o le Agaga Paia se loto fa’amaoni ua fa’apogai

mai i le salamō, ma le fa’atuatua i le Alo o le Atua na maliiu ma toetu mo i tatou. E fa’aalia le fa’amaoni o le Atua i o tatou ola pe a nofo tupu Keriso ma lona Agaga i o tatou loto ma mafaufau. Ia fa’ailoa mai i lau amio ua lelei i le itu fa’ale-agaga lou loto fa’amaoni e tali atu ai i le fa’amaoni o le alofa fa’aola o le Atua mo i tatou.

GALUEGA FA’ATINO: Fa’atalatalanoaga:

Fa’asoa ma fa’atalatalanoa le Autalavou ina ia fa’aali ni o latou manatu i le mataupu: “o a ni ‘ese’esega o le fa’amaoni o le Atua ma le fa’amaoni o le tagata”

O nai manatu e fesoasoani i le fa’atalatalanoaga:

1. O le fa’amaoni o le Atua – e fa’atuatuaina, e onosa’i, e lē fa’ailoga tagata, e talimana’o i ona tagata puapuagatia, ma le tele o isi mea lelei uma o lo’o taua i fua o le Agaga.
2. O le fa’amaoni o le tagata – E fa’amaoni i nisi taimi ae masalosalo i le tele o taimi, e fiu gofie, e fa’ailoga tagata, ma le tele o isi amio e lē atagia ai le alofa fa’ale- Atua.

MANUIA TELE LE ASO SA O LE TALALELEI

////////////////////////////////////

ASO SA – SETEMA 13, 2026. “SU’ESU’EGA I LE TUSI PA’IA”

MATAUPU – “O AMATAGA UMA O LE ATUA”

TUSI FAITAU – KOLOSE 1: 1 - 10

FA’ATOMUAGA: O le ‘auga o lenei fa’asoa fa’atasi, o le taumafai lea ia mautu i tupulaga o tama ma teine le mea moni e lē mafai ona suia, **o le Atua lava le amataga o mea lelei uma.** O le iloa loloto o le Atua amata mea i mea lelei uma mo le ola manuia o le tagata, o le ā mafai ona fa’atupuina atili ai le fa’atuatua o le talavou e mautinoa ai i le fa’amaoni o le Atua, ona mafai lea ona tali atu i le Atua i le alofa moni ia te ia. E savali ai i manuia o le Atua, e fa’amuumua ai le Atua i lona olaga, ma atoatoa ai lona alofa moni i le Atua, i lana amio ma ana mea e fa’atino. Ia mautinoa i le fa’atuatua, so’o se mea lava e fai e le tagata, e tataua lava ona fesili muamua i le Atua e ala i le tatalo, o le ala lena e ta’ita’iina ai mea uma e faia. A fai foi e ma’ea, e toe fa’afoi lava le fa’afetai i le Atua, auā ua talitonu ma le mautino lelei, ua fa’ai’uina ma manuia se taumafaiga ona o le Atua amata mea. O i’ina , o le a mafai ona fua mai ai ni fua mo le Talalelei, e tāua tele lo tatou mausalī i le tatalo ma maua’a i se faia loloto ma mautū ma le Atua. O le upu tatalo, na fa’amatalaina e Katinale Hume e fa’apea – **O le faia. O le uiga lea o le upu tatalo. O le gaosiga o se faigā faia e ola, e militino ma vavalalata ma le Atua.** E mana’omia ai le taimi, avanoa, fa’amaoni ma le galue. Fa’apea foi le talitonuga maumaututū, e ui ina tatou le i ai ma le Atua, ae o ia e i ai pea ma i tatou, ma e mafai ona ia liua tagata e avea ma se tasi o lona alofa tunoa. Mata e le taitai ona tatou va’aia pe iloa fua o a tatou taumafaiga? – ae le o le ‘auga lena.

SINA FA’ASOA MO LE MATAUPU:

Pe a tatou manatu i le lalolagi lenei tatou te ola ai, sa i ai lona amataga. Na amata mai i le so'ona nunumi ma le gaogao, e tusa ma le tala a Kenese. Na fa'avasega lea e le Atua e pei foi ona i ai manu ma la'au. E amata mai i le laiti, a solosolo lelei ma manuia e ono o'o lava i se tulaga e tupu talaulau ma lapopo'a. E fa'apena foi amataga o lo'o i ai i la tatou mataupu. O ni fa'amoemoega sa tau amata ma atia'e fa'atupu ma fa'aola se'ia o'o lava ina fua tele mai. O foliga va'aia na o le Tusi faitau ia Kolose o lo'o aumai ai. O lo o amata mai i le fa'afeiloa'i a Paulo, o le Aposetolo a Iesu Keriso ma le uso fa'ale-agaga o Paulo o Timoteo. O le fa'atalofa ma le fa'afeiloa'i i le 'au paia i Kolosse, o e ua talia Keriso ma talitonu i ai. O se amataga lelei ua amata ai, ona soso'o lea ma le fa'afetai a i laua, e ao lava ona fa'amuamua ma amata mea, o le fa'afetai i le Atua ma Iesu Keriso ia aua ne'i galo. O lona suafoa lea ua fa'aa'o i ai le 'au lutaia ma le Ekalesia paia. So'o se mea e amata i le Atua, e talitonu le Aposetolo o amataga manuia ia e le taumateina.

O ni amataga ua amata lelei ai le tusi lenei o Kolose, aemaise ina ia nofotupu i mafaufau ma lagona o le 'au paia ma le Ekalesia, ana le seanoa le alofa lavea'i o le Atua na ia i latou fa'atasi ma Epāfara sa ia i latou, e le fa'asolo ina tupu ma olaola le galuega a le Atua i Kolose. Ona fa'alautele mai lea e le Aposetolo ma nisi mea tāua e ao ina mulimuli ai, o le fa'amoemoe e tataua ona tulituli matāgau pea ia tino mai ni fua lelei o le ola mamā, le amio lelei ma le talia o tagata i le alofa o le Atua, ua amata mea i lo latou fai ma so'o o Keriso po o tagata o le Ekalesia.

O amataga e masani ona fa'aupu o fa'avae. A lelei ma mautū fa'avae, e le toe malepe se galuega. O fa'avae o galuega i Kolose, sa fa'avae pe amata mea i le Atua. O le olioli ma le fialia loloto lea o le Aposetolo na ia fa'ailoa atu ai ia Kolose lo la le mapu i le tatalo mo i latou talu le aso na la fa'alologologo ai i le fua ona o le upu o le mea moni ua i le Talalelei na latou (kolose) fa'alologologo ai, ma iloa lelei ai ma le fa'amaoni le alofa tunoa o le Atua. O le fatu na lūlū e lo la fesoasoani pele o Epāfara ia i latou, ua fua mai i lo latou alofa mai i le Agaga po o le Ekalesia a Keriso.

UPU FA'AI'U:

O le fa'amanatu fa'amalosi lea mo tupulaga talavou o tama ma teine i a latou filifiliga fai, ina ia amata mea uma i le Atua ma toe fa'ai'u i le Atua. O le tatalo a Paulo ma Timoteo ia Kolose, ua la 'aio'i atu ai ina ia o latou iloa lelei mea tāua ia, ma ia fa'ailoa mai i o latou olaga ma tumau ai e tusa ma le finagalo o le Atua.

1. Ia atoatoa ona latou iloa lelei o le finagalo o le Atua, atoa ma le mafaufau fa'ale agaga.
2. Ia latou savavali e tusa ma le Alii, ina ia fialia mai o la ia te'i latou uma.
3. Ia latou fua mai i galuega lelei uma lava.
4. Ia tupu pea lo latou iloa lelei o le Atua.

O le feau mo tupulaga, na amata mai i matua o tatou olaga, fa'afailele, tausia, a'oa'o ma fa'atonutonu ina ia matata'u i le Atua e manuia ai, ia usita'i ma fa'alogologo o mea ia e manuia ai lo tatou ola. Ae o le fa'amanatu mo talavou uma ma fanau foi, aua le se'etia gofie i suiga ma talitonuga fou ua ofi mai i o tatou laufanua, O amataga lelei, o le Atua – e ta'ita'i ma fa'avae ai lou ola talavou e ala i lou tagata atoa ua ola mo Keriso. Aua nei galo Iesu Keriso na ia faia le amataga fou i lo tatou ola tuai i le ola fou toe

fuata'iina e ala i lona maliu tiga i le satauro ma lona toetu mai le oti ma le tu'ugamau. Ma tatou te maua fua lea amataga fou e ala i le salamō ma liliu atoa atu ma le fa'atutua i le Atua e fa'ailoa mai amataga fou, sa'o ma lelei mo i tatou, e tau atu i manuia e fa'avavau o le ola i a'ao o le Atua.

MANUIA LE ASO SA

ASO SA – SETEMA 20, 2026 “AGANU’U” (Fa’aauau mai ia Aokuso)

MATAUPU – “O LE MATAI MA LE FA’AMATAI” (E fa’avavau aiga)

FA’ATOMUAGA

Se'i vavae foi foe i nai fa'asoa pupu'u ia e saga matimati ai pea si a tatou aganu'u, e ui ina ua tele lava suiga ma faiga, ae lē ave'ese ai lo tatou ta'u ma lo tatou fa'asinomaga ma i le amataga, o le samoa auuliuli lava. Ua manatu lava e faigofie ona fa'amanatu i nai tupulaga mau fa'avae o le soifua o le Samoa i totonu o le aiga ma le nu'u, pe a a'oa'oina lelei mau ia, e ui lava ina 'ese'ese i ai le tele o talitonuga, ae tumau lava le fa'avae papa o le ta fa'asamoa.

O LE MATAI MA LE FA’AMATAI:

O le tofi matai, o le mea totino ma o le totonugalemu lea o le aganu'u a Samoa. O le uiga o le upu “mata”, o le tagata lea e mata uma i ai mea lelei uma a le aiga ma fai ma fa'ata'ita'iga lelei mo le aiga i so'o se mea lava. O le **matai** e pule ma le alofa i le aiga, atoa ma le amiotonu, e fa'amamaluina ma alofagia foi e i latou uma e i lalo ifo o lana ta'ita'iga ma lana fa'amalumaluga. Fai mai le Tusi Paia, ‘**a pule e amiotonu e saogalemu le nu'u, ae a pule e amioleaga, e mapuitigā le nu'u**’. O le fa'amoemoe tupito o le fa'amatai, o le puipuiga o le soifua manuia ma le saogalemu o tagata uma o aiga ma nu'u, E fa'amanuiaina foi tagata uma ona o fuafuaga ma le pulega lelei a matai o le nu'u. E i ai foi le talitonuga e fa'avae le ta'ita'iga a le matai i le agaga o le Atua e ala i le tatalo, anapogi, musumusuga ma fa'aaliga e lima ta'ita'iina ai lona aiga. E fa'apei o upu o le pese e fa'apea, ua tofia e le Atua Samoa ina ia pulea e matai, auā o lona suafa ua vaelua i ai.

ITUAIGA O MATAI:

O le 'ese'esega o itu aiga o matai, e fa'amatalaina e o latou fa'atamali'iaga ma tiute fa'apitoa ua tofia i ai i latou. Mo se fa'ata'ita'iga faigofie e fa'apea, **e i ai alii sili, e i ai foi vaialii. E iloa gofie alii sili ona e nonofo i pou o matuātala o le maota. O vaialii e nonofo i pepe o le maota, e i ai foi tulāfale sili e nonofo i pou o lauga i luma o le maota. O vaitulāfale (tulāfale fa'avai pou) e nonofo fa'asolo i pou i le atualuma o le maota.** *(E lelei ae taumafai e fa'amatala, pe saunia foi se maota e matuā fa'amanino ai i tupulaga vaega o le fale e pei ona ta'ua.) Atonu o se taimi o i luma ona o'o lea i ai o se taumafaiga i vaega o le fale samoa mo tupulaga.)*

FILIFILIGA O SE MATAI:

A filifili se matai, e soālaupule e le aiga potopoto ma maua se finagalo ‘autasi i se tasi e fa’ae’e i ai le suafo matai e tausia le aiga. E lē faigofie le filifiliga o se matai ona o le to’atele o sulī, faletama, ma itupaepae e tau uma i le suafo o aiga. I aso anamua sa tasi lava le matai sa filifili e se aiga potopoto. O aso nei, ua tele ina tatala suafo ina ia fa’amalieina ai uma faletama ma itu paepae o le aiga potopoto. Sa masani, a ma’ea ona filifili se aiga ona fa’ae’e lea o le suafo i se tasi o lo’o nofo ai i le aiga po’o atunu’u mamao. O le taimi nei, ua fa’atulafonoina le toe foi mai o le tagata ua tasi i ai le aiga potopoto i Samoa e fa’atino lana nofo ina ia aloaia ai.

O NISI O AIAIGA E FILIFILI AI LE TOFI MATAI:

1. E ao ona i ai le maliliega ‘autasi pe a soālaupule e le aiga se matai fou.
2. O ia o se sulī tupōlata po’o se sulī moni ma e tau i le gafa o le aiga.
3. I lenei vaitau, ua aofia i filifiliga sulī sa’otā, sulī tupolo ma sulī tupā.
4. O ia o se tagata e tautua lelei, loto alofa, agalelei ma osi aiga.
5. O ia o se tagata Kerisiano ma e to’aga ma tautua lelei i le lotu.
6. E mamalu ma fa’aaloalogia e tagata i lana gagana ma tu ma aga masani.
7. E atamai i le gagana ma le aganu’u ma e lelei le fofoga e feso’ota’i ai.
8. Fa’aopoopo ane ma nisi aiaiga ua le maua atu i’inei.

NAI UPU IA E FA’AMALAMALAMA I NAI TUPULAGA MA FANAU:

1. Sulī Tupōlata – o le sulī moni po o le sulī tau toto o le aiga.
2. Sulī Sa’otā – o le sulī tamafai po o le tama fa’ate’a.
3. Sulī Tūpolo – o le sulī e ala i le faiaivā po o le nofo tane mai le aiga.
4. Sulī Tupea – o se uo po se tasi e masani ma ua leva ona nofo ai i le aiga.

Fa’aiu i se saunoaga a lau Susuga e ta aofa’i ai le mataupu, ma fa’atāua atili ai i tupulaga lo tatou fa’asinomaga.

Manuia tele lenei afiafi

////////////////////////////////////

ASO SA – SETEMA 27, 2026. “SU’ESU’EGA I LE TUSI PAIA”

MATAUPU – “O LE LEONA TAGI/TUPU”

TUSI FAITAU – AMOSA – 1: 1 – 15.

FA’ATOMUAGA – O le tagi ma le uiō a le liona, e fefefe ai tagata ma gatete ai manu uma o le vao. O le leo o’olo e paū e tau nofo ai le manava a le tagata e fa’alogo i ai. O le fai ata tifaga a le kamupani o le MGM, latou te fa’aaogaina le tagi a le liona e iloa ai e tagata matamata o le a amata le ata. E fa’amatagofieina i le fa’aupuga Latina ua fa’aliliuina o le, **“liona tagi,”** o le tagāvai lea a le fai ata tifaga MGM. Mo Amosa, o le **liona tagi** foi lana tagāvai. Afai la o le moto a le liona a MGM, o le ‘ata mo le lelei o le ata, o le moto foi o le liona a Amosa o le lotu, e lē mo le lelei o le lotu. A’o le lotu, e mo le lelei o le fa’amasinoga ma le amiotonu. **E tagi le liona a MGM – o le ā amata le ata, ae tagi foi le liona a Amosa – o le a amata le i’uga o Israelu.** O le i’uga o Israelu e ala mai le tafeaga ma le mafu’ie – o puapuaga fa’ale-malo ma mala fa’ale-natura. O le tagi o le liona e mafua ai ona lūlūina le lalolagi, na te

vala'au i malo ma atunu'u e tali i a latou amio, na te fa'atonu le perofeta e vavalu. Mai le tumutumu mauga o Siona e ta'alili atu i tumutumu mauga o Karamelu, mai sauté foi i matu, ma e pei o le gogolo o le tagipalau tu'i i le fa'ateteleina o le leo o'olo e ta'afili atu i le malo ma toe ta'avili mai ia Amosa, e fa'amatagataga lona laulaufaiva mo le Atua. O le Atua o le Leona. A tagi le Leona a Amosa, e lūlūina fa'avae o le lalolagi ma gatete malo uma. O le fa'amoemoe lea o lenei su'esu'ega pu'upu'u, ia mautū pea i loto o tupulaga, o le Atua pule aoao lava o lo aga'i i ai le fa'atusa o le Leona tagi.

SINA FESOASOANI MO LE MATAUPU –

O le tagi a le Leona ta'anoa, e lau logo uma ai manu o le vaomatua, ma fa'alologo uma i ai manu o le fogāelele. O se manu e mata'utia lona malosi ma lona sauā i meaola uma fa'apea ma tagata. E fa'apena foliga o le malosi aoao (omnipotence) o le fa'amasinoga (judgement), a le Alii le Atua, o le ā ia fa'ao'o i ona tagata (Isaraelu ma luta) fa'apea ona nu'u tuā'o'i. O le fuaiupu e 12, o lo'o fa'aaoga ai e Amosa le upu leotele (roar) mai le Alii mai Siona, e tulei ifo foi lona siufofoga mai Ierusalem. O le mataupu 3, fuaiupu 8, o lo'o fa'aaoga ai le upu lava lea e tasi, ua tagi le Leona (roar) po'o ai se le fefe. O le ata fa'atusa manino o le fa'amasinoga amiotonu a le Alii, e aofia ai ona tagata ma le lalolagi uma. O le fa'amasinoga e afua mai Siona ma Ierusalem, Aisea? Auā o le a'ai a le tupu silisili. O le a'ai e fa'aalia ai le alofa fua ma le mutimutivale o le Atua mo tagata uma, a'o le fa'aaliga lava lea o le amiotonu, le fa'amasinoga (justice) ma le fa'amaoni (faithfulness) o le Atua. O le fa'amasinoga (judgement) ua aofia ai Isaraelu ma luta ona o le lē usita'i i le Atua, fa'apea foi ma nu'u ese uma ona o le ola so'ona fai ma le pule sauā i nai tagata vaivai (crime against humanity) fa'apei ona fa'amatala e Amosa i le tusi faitau.

TAIMI O LE PEROFETA O AMOSA

O le taimi o Amosa, e muamua la'ititi atu lava i luma o Isaia, e lē o ia o se tagata taualoa, a'o ia o se tagata faifa'ato'aga ma galue i le fanua. E manatu fa'atauva'a i ai le to'atele, ae ua fa'aaogaina e le Atua e fai ma perofeta, ona o se tagata fa'amaoni ma talitonu i le Atua. O Amosa ma ana perofetaga, e fai si mamafa o ana upu nai lo'o isi perofeta o le 8 seneturi. E fa'apei foi la o lona fa'ailoa atu, e lē tupu fua le to'asā o le Atua, e mafua ona ua tele le agasala ma ua leai se amiotonu e fa'aalai i le soifua o tagata. O le mea lea e leotele mai le Alii mai Siona, e tulei ifo foi lona siufofoga mai Ierusalem, e ala mai le mafu'ie e lūlūina ai le lau'ele'ele.

FEAU MAI LEA VALOAGA:

O le ata atoa lea o le a valoaga a Amosa. E fa'apei o se leona ta'anoa e tagi leoleoā i le vaomatua, e fa'apea le ta'alili mai o le to'asā o le Atua. I le uma ai o le lua tausaga o lapataiga, a o le i'uga ua o'o mai. O le to'asā o le Tupu o tupu, e amata mai lava i totonu o ona lau'ele'ele e fa'asolo atu i fafo, āia le mauga o Karamelu sa to'omaga i ai le nu'u i lona tamaoiga o fa'a'ele'eleaga eseese, ae fai mai le tala e mago ma fa'asolo ina matelaina. Na te tauia ai le agasala a Tamaseko (Suria) ma ona a'ai ua ta'ua, agasala a Kasa ma a'ai uma o Filisitia, o Turo, o Etoma, ma le fanauga a Amoni. O le matuiā o agasala a ia nu'u o lo'o fa'amatalaina e Amosa i le fuaitau lea, **“e tolu agasala, e fa foi”** O lona uiga ua tumu le fua e pei o le upu, a matua le agasala e fanau mai ai le oti. O nu'u ma tagata uma e lē iloa le Atua, po'o e foi latou te

iloa ae le gaua'i lava, oi talofa, o lo latou malosi'aga e i ai o latou atua e fa'amoemoe i ai, peita'i, e o'o mai lava le to'asā o le Atua ma lona si'ufofoga mata'utia, e lē toe i ai lava se tasi e tu ma tete'e atu, pe na te mafai foi ona taofia lona mata'utia. Auā o le Atua sili ia, o le Tupu o tupu, o le pule ma le amiotonu atoatoa e leai se tasi e latalata iā te ia .

TOE MANATU:

O le mataupu lena a le Perofeta o Amosa ma le uiga lea o le leona tupu, auā e mata'utia toe silisili'ese i le lalolagi uma. E ao i nu'u uma i alii ma faipule, se'ia o'o lava i fanau iti ona fa'alologo ma usita'i, savavali e tusa o ala o le Atua, ma faia lona finagalo. O i tatou foi le tupulaga, o le mata'u i le Atua o le amataga lea o le poto ma le atamai. Po'o a fiafiaga ma suiga matagofie ua se'etia ai o tatou lagona, tautuana aua nei galo ona pipi'i pea i le Atua ma savavali pea i ona ala, na o ia lava tatou te manuia ai.

FESILI FA'ATUPU MANATU:

1. O le a sou silafia fa'atupulaga o aso nei, O toe fefefe tupulaga i le siufofoga o le Atua pei foi ona lailoa ai faifeau e lauga pea?
2. Fa'amata o sa'o tupulaga i le taofiaga ua lava ma totoe le atamai ua iā i latou e sao mai ai i le to'asā o le Atua?
3. O upu o le tusi, a to le tu'inanau ua fanau le agasala, ae a matua le agasala ua fanau le oti? O le a se feau malosi mai ia upu mo le tupulaga?
4. O le a le ituaiga perofeta e i ai Amosa? Ae fa'amata e mafai ona avea lou talavou e pei o Amosa i le galuega a le Atua?

MANNUIA TELE LE AFAFIA, MALO LE ONOSAI

////////////////////////////////////

OKETOPA – TAPENAGA MA MALOLOGA O LE LOTU TAMAITI. MANUIA TELE LE ASO SA PAEPAE O LE FANAU.

ASO SA – NOVEMA 01, 2026. 'FA'ATALATALANOAGA I LE TUSI PAIA"

MATAUPU - "O LE TALANOAGA I LE POGISA A NIKOTEMO MA IESU"

TUSIFAITAU – IOANE – 3: 1 – 2/19: 39

MANULAUTI E TULIMATA'INA –

Ua manatu e tulimata'ina i lenei fa'atalatalanoaga iā Iesu ma Nikotemo , i se fesili e fa'apea, ***"O le a se tāua o le talanoaga a Iesu ma Nikotemo i le pogisa?"*** O le tala ua lauvivilu ai tupulaga, peita'i, e manatu lava i a'oa'oga maua pea mai le Tusi Paia, o feau tāua ia ma le fou pea mo tupulaga ma tatou uma mo le savaliga fa'aleagaga, e lē gata o tupulaga, a'o fanau ma tagata uma.

FESOASOANI MO MATAUPU –

O le igoa Nikotemo (Nikodemos), e maua mai upu Eleni e lua(2). **"1. Nike – victory. 2. Demos – people. O le igoa la Nikotemo (Nikodemos) – o lona uiga – victory of the people. Nikotemo – o le manumalo o tagata. "**

O AI NIKOTEMO – O Nikotemo o le tasi o le ‘au Faresaio (Pharisee) - o tagata atamamai latou te a’oa’oina le tulafaono fa’a – lutaia. O Nikotemo o le faipule o lutaia – leader of the Jews– o le isi lea tulaga taualoa o so’o se Faresaio i totonu o lutaia, e fa’alupe i latou o Faipule – leaders of the community. O Faresaio ma le ‘au tusiupu i le vaitau o Iesu, latou te lē taliaina Iesu o se Alo o le Atua. E manatu lava i latou o Iesu o le atalii o Iosefa le kamuta. O le tama a Maria. E tutusa Iesu ma isi tagata. – (nomal people.)

O le fa’apogai lea o lo latou sailiili masei i le galuega a Iesu. Latou te taumulimuli e fia iloa ni auala e ona molia ai Iesu i le tulafono a le malo o Roma. Pe afai foi e talanoa se Faresaio ia Iesu, e tasi a le ‘auga, o le taumafai e fa’aleaga/fa’asesē a’oa’oga a Iesu ina ia tupu se feitaga’i i le va o Iesu ma tagata lautele. Peita’i, e tulaga ese Nikotemo e pei ona iloa i le tala na faitauina. O lo’o manino i le tala, na alu Nikotemo e fa’ailoa iā Iesu lona ofo tele ma le taliaina o tala’iga ma a’oa’oga fa’atasi ma fa’ailoga (signs) o lo’o faia e Iesu. O le fuaiupu ua fa’a’autu i ai le tatou fa’atalatalanoaga o lo’o tele lava ni a’oa’oga tāua o lo’o afifi mai ai.

F: 2 – “Rapi e, ua matou iloa o oe o le a’oa’o ua malili mai, mai le Atua, auā e lē mafaia e se tasi ona fai o ia fa’ailoga e te faia. Ana le iā te ia le Atua” **O le upu Rapi e**, - O le fa’alupega e fa’alupe ai tagata maua luga o lo’o a’oa’oina faiaoga o le tulafono fa’a-lutaia – **Rabbi** – **meaning: my great one, my honourable sir, a title used by Jews to address their teachers.** O Nikotemo o le Faresaio, o le faiaoga o le tulafono. A o le faiaoga o Nikotemo e fa’alupe o le **Rabbi**. **“Rapi e.”** A’o lea ua fa’alupe pe fa’aigoa ai e Nikotemo Iesu o le **Rabbi**. O upu ua ta’utino ai lagona o le fa’atauva’a ina ua va’ava’ai i fa’ailoga na faia e Iesu. O lo’o fa’aaogaina e Nikotemo le soānauna numera tele i lana ta’utinoga = **Rapi e, ua matou iloa o oe.....**” O lona uiga e to’atele isi Faresaio ua latou iloa le mana ma le malosi ua ia Iesu ua faia ai o fa’ailoga ‘ese’ese, peita’i, e lē o mafai ona talanoa ma fa’ailoa ia lagona ia Iesu e pei o Nikotemo. O le upu – **fa’ailoga/signs** - i tusitusiga a loane, e uiga tutusa ma le upu –**vavega/miracles**, e pei ona fa’aaogaina i tusitusiga a isi fai evagalia – Mataio, Mareko ma Luka. I le talitonuga o loane, o le fa’atutūina o tagata na ma’i pipili, o le fa’amalōlōina o tagata na ulufia e temoni, o le fa’apupulaina o tauaso, o le fa’amalōlōina o e na maua i le ma’i lepela, ma isi lava galuega fa’amalōlō na faia e Iesu, - o fa’ailoga/signs ia o le Mana ma le Malosi ua iā Iesu mai le Atua. Lea lava e ta’utino ai Nikotemo, **auā e lē mafai e se tasi ona fai o ia fa’ailoga e te fai, ana le iā te ia le Atua.**” O le ta’utinoga ua saga fa’amautinoa ai lo tatou talitonuga fa’a – Kerisiano. E mafaia mea uma i le fa’atasi mai o le Alii ia i tatou.

AISEA NA ALU AI NIKOTEMO IA IESU I LE POGISA.

E lē o matuā manino se tali mautū i lea fesili. Peita’i, ua tatou iloa le va feso’ota’i o Nikotemo ma Iesu i lona tulaga fa’a – Faresaio, e lē faigofie ona talanoa i le malamalama a’o va’ava’ai tagata. O lo’o manino foi le tala a Nikotemo, e to’atele isi Faresaio o lo’o fia talanoa ia Iesu, ae le mafai ona o le va’ai mai o tagata. Peita’i, o lea ua sau i le pogisa i le manatu, na pau lea o le auala e maua ai se avanoa e fa’asoa ai ia Iesu i se mea o i lona loto. O lona uiga, o le alu i le pogisa, e lē o se mea leaga i le manatu o Nikotemo, a o se auala ina ia lē gata e tali ai lona mana’o e talanoa ia Iesu, ae o se auala toafilemu foi lea ma sili iā te ia le taimi lea, mo ia ma lona vala’auina. I le Galuega – 17: 10 - O lo’o ta’ua ai le alu ese

o Paulo, mai Tesalonia i le pogisa, ona o le matamata ita o tagata i le Talalelei. O lo’o fesiligia ai foi e nisi pe aiseā ua sola ese ai Paulo i le pogisa, pei se alu a se tagata ua leai se fa’atuatua. Peita’i, o le alu o Paulo i le pogisa, o se auala e tausi ai le filemu i le va o le ‘aufaigaluega ma tagata o le nu’u. O mea fa’atauva’a i le manatu o le tagata, o i’ina o lo’o galue mai ai le mana o le Alii mo le manuia o lana Talalelei. A fa’aauau le talanoaga a Iesu ma Nikotemo, na o’o lava i le uiga o le toe fanaufouina o le tagata, ina ua lafoa’i uiga tuai ma amioga o le pogisa ae fa’asaga tonu i le Alii ma lona finagalo.

TOE MANATU

E tãua le fesili e tupu ai le malamalama. Sa lilo lava i manatu o Nikotemo, e lē mafai ona toe fanaufouina o ia e avea ma tagata o le Alii. E ui o lo’o tu’ua’i le sau i le pogisa, peita’i, o ala ma faiga ia o le filemu ae ia maua se tali o le tu’ufesilisili. Tupulaga, fesili ia Iesu pe a e fia iloa moni se mea.

Fesili e fa’asoa i ai e fa’alatele ai le mataupu

1. O a ni mea taua o mafai ona iloa i upu a Nikotemo i le fuaiupu e 2?
2. Na i ai se a’oa’oga o le talanoaga a Nikotemo ma Iesu i le pogisa?
3. Fa’amanatu le uiga o le igoa Nikotemo?
- E i ai se aogā o le talanoaga a Iesu ma Nikotemo i le pogisa mo oe le talavou o aso nei?

IOANE – 19:39 – O lo’o faamatala ai le sao tãua o Nikotemo na fai mo Iesu a’o le’i tu’uina i le tu’ugamau.

4. I le tele o fa’afitauli ua feagai ma tupulaga i nei aso, o le a se feau taua mo oe le tama ma le teine talavou mai le talanoaga i le pogisa a Nikotemo ma Iesu e te fesoasoani ai I le isi?

MANNUIA LE FETUFA’AIGA I LE LENEI AFIIFI

////////////////////////////////////

ASO SA – NOVEMA 08, 2026 ‘AGANU’U’ (fa’aauaua)

MATAUPU – “O LE NU’U” (AFIO’AGA) (E fa’avavau aiga)

FA’ATOMUAGA – E tulaga ‘ese Samoa i le lalolagi ona o le fa’atulagaina o ona afio’aga ma nu’u māvae, ma ona itumalo. O le a tatou talatalanoa pu’upu’u lava i le mataupu lenei i le nu’u po’o le afio’aga, o lona fa’atulagaga, fa’alupega, tuāo’i, o faigānu’u eseese, pulega, fa’atasi ai ma tagata nuu ma a latou matāfaioi ma galuega fai mo le manuia ma le nofo lelei o le nu’u.

FA’ATULAGAGA FA’AVAE: Ua iloga nu’u uma o Samoa, ma ua tofua foi le nu’u ma ona matai e tausia lea nu’u. O le telē lava o le nu’u o le to’atele lava foi lea o matai o lona nu’u. O matai tamāloloa sa amata mai ai le fa’amamaluina o lea tofiga, peita’i, ua saofagā foi tamaita’i i le saofa’iga a alii ma faipule o nu’u, ina ua ave i ai le fa’aaloalo e tau’ave ai tofiga matai a nu’u ma afio’aga. O lo’o iai lava nai nisi nu’u laiti e lē o mafai ona talia le avea o tamaita’i e nofoia suafa matai o aiga. O le saofa’iga la a matai po’o alii ma faipule o le nu’u, o i’ina o lo’o afifio ai matai alii, ma alaatala’i ai foi ma matai tulafale.

I so’o se nu’u e iai fale tetele e ta’ua o maota, e afio ai le alii ma lona faletua, e fa’apea foi le laoa e alaatala’i ai le tulafale ma lona tausī. Sa tofu foi aiga ma faletalimalo, afolau, ma faleo’o e nonofo ai tagata uma o aiga ta’itasi. E tofu foi aiga ta’itasi ma fanua ma ‘ele’ele totino na soifua a’e ai o latou tuaā i aso ua mavae. O nei lau’ele’ele e ta’ua o fanua fa’ale-aganu’u. E i lalo o le fa’amalumaluga ma le tausiga a le matai sa’o. E pulea ma nonofo mau ai tagata uma o le aiga potopoto, e lē ave’esea lava, lisiina pe fa’atauina foi i se isi e pei. E ui ina ua tatou va’aia ua vevesi foi nisi itu o le atunu’u ona o tulafono a faigamalo.

O totonugalemu o le nu’u o lo’o i ai le malaefono e fono ai alii ma faipule ma tapuvaetasi i ai gaoioiga uma a le nu’u i mea uma e faia. E aofia ai foi ma ta’aloga a tupulaga. Toeitiiti lava o nu’u uma o le atu Samoa, a tofu ma le malae kirikiti i le ogatotonu o le nu’u, auā o le ta’aloga patino lea sa feso’ota’i ai nu’u ma isi itumalo, o le ta’aloga foi na tele ina maua ai usuga ma talagā gafa.

FAUSAGA MATAINA – O fausaga mataina i totonu o nu’u, o o latou falesa maualuluga sa fausia mai i le namu(umu amu e susunu) po’o le amu susunu. E matagofie fausaga o falesa i aso anamua sa aunoa ma ni masini ma mea faigaluega e fausia ai nei maota paia mo le tapuaiga i le Atua Soifua. O galuega tetele ma mamafa fa’apenei e iloa ai le maopoopo ma le galulue fe’oe’oea’i o faigā nu’u uma o matai, tamaita’i, ma le ‘aumaga e o’o lava i le fanau ma le agaga ‘autasi ina ia fa’ataunu’uina la latou ‘au’aunaga i le atoatoa ma le lelei.

FA’AIUGA –

O le a fa’agata i i le talanoaga o lenei afiafi, toe fa’aauau atu i le aso sa o muamua. A e taua pea le fa’amalamalama ma fa’atalanoa le va’aiga lautele i aso ua mavae ma aso nei i le suiga ua i ai le tele o nu’u o le atunu’u. O le fa’amoemoe tāua lava, ia momoli pea i tupulaga le faamanat i la tatou aganu’u ma le agaifanua, e ui ina ua ola ae i latou i le tele o suiga ma fa’atinoga, ae fa’amanatu pea ia i latou lo tatou fa’asinomaga ma ona fa’avae. Po’o a faiga ma suiga, a ia tumau ma mautū fa’avae i lo latou iloa.

MANUIA LE FA’ASOA I LENEI AFIIFI

////////////////////////////////////

ASO SA – NOVEMA 15, 2026. “AGANU’U” (fa’aauau mai le vaiaso ua tuana’i)

MATAUPU – “O FAIGANU’U A SAMOA” (E fa’avavau aiga)

I totonu o so’o se nu’u o le atunu’u, o lo’o i ai se fa’avae e ‘autu i ai le vaevaega o faiganu’u po’o saofa’iga mavae, ma o lenei fa’avae e tumau pea lona mamalu i totonu o nu’u e lē mafai lava ona toe ave’esea.

1. SAOFA’IGA A MATAI: ALII MA FAIPULE.

O le nu’u o matai, ua ta’ua foi o le nu’u o alii ma faipule. O i latou nei ua saofagā i suafa matai o aiga i totonu o nu’u. E pule fa’amalumalu i gaoioiga uma e faia i totonu o le nu’u. Latou te faia tulafono mo le lelei ma le saogalemu manuia o le nu’u. Afai foi ua solia e se tasi se tulafono, e mafai foi ona latou faia fa’asalaga talafeagai ina ia puipuia mai ai tagata mai le faia o gaoioiga lē talafeagai mo le nofo filemu o

le nu’u. O fa’asalaga e masani ai o le fa’ataumamafaina o le nu’u, e fua i le mamafa o le soligatulafono. Fa’asoa e outou isi fa’asalaga fa’ale atunu’u i totonu o nu’u.

2. SAOFA’IGA A TAMAITA’I SA’OAO MA AUALUMA

O le nu’u o tamaita’i e aofia ai sa’oao ma aualuma, faletua ma taus, ma e ‘auai uma tamaita’i uma o le nu’u. E fa’apei o le nu’u o matai. E i ai le tamaita’i e tausia ma ta’ita’ia le saofa’iga a tamaita’i. O lo latou tiute fa’apitoa o le taus lelei lea o le mamā ma le matagofie o le nu’u. O le soifua malōlōina lelei o ona tagata, aemaise lava o nai tagata matutua ma le fanau. E masani ona iai le maota e ta’ua o le fale o le Komiti, po’o le maota o tamaita’i, e fa’apitoa mo a latou gaoioiga i aso ta’itasi. E ta’ua foi le aualuma o fai ‘oa a le nu’u. O le faiva alofilima o le ‘au matua u’u ma le ‘au se’epapa, e lalaga a latou fala, ie sina ma ie sae, ma gaosi siapo, meataulima, ma ‘oa, o measina a le atunu’u e tāua i le soifuaga ma le tausia pea o tu ma aganu’u a samoa. Fa’amolemole fa’amalmalama ma fa’asoa ma tupulaga i upu o lo’o ta’ua i luga i le saofa’iga a tamaita’i ina ia latou iloa le ‘ese’esega ma a latou tiute mo le manuia o le nu’u. Ia silafia foi measina ua ta’ua ma lona gaosiga.

3. SAOFA’IGA A ‘AUMAGA: TAULELE’A

O le nu’u o aumaga, e auai uma lava taulele’a e lē o ni matai. O le taimi lava e uma ai le aoga a le tama ma ua foi i le aiga e tautua, ua i ai foi o ia i totonu o le ‘aumaga. E fai e le taule’ale’a se taumafataga e o’o ai i totonu o le faiganu’u a taulele’a po’o ‘umaga. O le taule’ale’a e aofia ai alii o le nu’u, atoa ai ma faiaivā i totonu o le nu’u. O le ‘aumaga o le malosi lea o le nu’u e fa’alagolago i ai so’o se mea e fai a le nu’u. O i latou nei e nofo tuāvae e fai le tautua auā le tausiga o aiga ma mea e fai i totonu o nu’u ma Ekalesia. O le ‘aumaga e nafa ma le vao ma le sami auā le tapenaina o mea e taus ma tautua ai lona aiga ma le nu’u.

FA’ALUPEGA O NU’U

Ua tofu afio’aga ma o latou lava fa’alupega, e fa’ailoa ai le fa’atulagaga o pa’ia ma mamalu o le nu’u. O fa’alupega e iloa gofie ai tamali’i ma faleupolu, tulaga maota ma laoa, malaefono, taupou, sa’otamaita’i igoā ipu, fa’apea aualuma ma ‘aumaga o le nu’u. E lelei foi ae taumafai e fa’amlamalmama fa’alupega o le tou nu’u ma ona fa’atulaga ina ia iloa ma taofi e tupulaga, auā e le ma iloa pe avea foi i latou ma matai i le lumana’i.

FA’AFETAI LE FA’ASOA, MALO LE ONOSA’I.

////////////////////////////////////

ASO SA – NOVEMA 22, 2026. “SU’ESU’EGA I LE TUSI PAIA” (Aso Fa’afetai)

MATAUPU – “LOTO FA’AFETAI MA FUA MAI”

TUSI FAITAU – KOLOSE – 1: 1 - 8

FA'ATOMUAGA - O le fa'amoemoe o le sailiiliga ma le fa'asoa mo lenei afiafi, o se toe fa'amanatu atili pea ina ia lē mate le soifua fa'afetai o tupulaga i le Atua. Ia le gata i lea, a ia atili fua mai i o latou olaga ma amio le vi'iga o le Atua, e saga atili vivi'i ma fa'afetai ai i le Atua. O le fua mai o le olaga i fua lelei mo le Alii, o le atili foi lea ona fa'aosofia le loto ma le agaga e fa'afetai ai i le Atua auā ua mautinoa, ua na o ia lava e ao ina vi'ia ma fa'afetai ona o manuia maua pea e le tagata. O le fa'amoemoe lea e fa'amamafa ai pea e le tatou ofisa lenei vaiaso tāua, e saga fa'amanatu ma a'oa'oina pea le Tusi Paia i le lagonaina o le loto fa'afetai i le Atua aua lava nei galo i tupulaga. Mo le tala, ia malamalama tupulaga i le mafua'aga ua fa'amaui ai le fa'afetai a Paulo mo le Ekalesia i Kolose. Ia malamalama atili foi i latou i auala o lo'o fua mai ai le ola fa'atuatua o tagata o le Ekalesia.

FESOASOANI MO LE MATAUPU:

I le aotelega o le Tusi lenei a Paulo i le Ekalesia i Kolose, o lo'o taumafai ai le Aposetolo e fa'amalamalama se nenefu po'o se lē mautonu o lo'o tu'ufesilisili ai mafaufau o tagata Kerisiano o i le Ekalesia. O le Ekalesia i Kolose e le'i fa'atuina e Paulo, ae na fa'atuina e Epāfara. Ae iai le talitonuga, o Paulo o lo'o fai ma faufautua malosi ia Epāfara. O lo'o iai foi le talitonuga, o le tusi lenei mo le Ekalesia i Kolose, na afua mai i tala o le galuega i Kolose, na afua mai iā Paulo a'o taofia ai i le falepuipui i Roma.

O le fa'afitauli tele lea o lo'o feagai ma tagata Kerisiano, o le fete'ena'iga o talitonuga. O talitonuga fa'a-lutaia ma talitonuga o nu'u 'ese po'o nu'u e lē talitonu i le Atua, ua fefiloi fa'asolo atoa. Ua o'o ai ina taumafai le isi talitonuga po'o le isi tapua'iga e fa'asesē a'oa'oga a le isi tapua'iga. O talitonuga e manatu le lotu lutaia e sa'o ua fa'asesē e tapua'iga o nu'u ese. Ua o'o foi i a'oa'oga Kerisiano lea e fa'atatau iā Iesu Keriso ua o'o iai le taufa'asesē a tapua'iga nei e lua.

O se fa'ata'ita'iga o ia fete'ena'iga, o le tulafono fa'a-lutaia lea e ta'ua i le Tusi Paia, o le tau i le mata i le mata po'o le nifo i le nifo. O lo'o talitonu tagata Kerisiano, ua a'oa'o mai Iesu, e lē toe aogā lea mea o le tau ma sui. Peita'i, o lea ua toe lalaga e tagata lotu lutaia, ma fa'apea mai, e sesē Iesu, ae sa'o i latou. E tataua lava ona toe foi i le mea lea o le tau i le mata i le mata. E o'o foi i le mataupu o le peritomeina; o le tasi lea o mataupu tele o lo'o talanoa ai Paulo ma toe fa'amanino, e tāua i le Atua le peritome o le loto, ae fai mai lutaia, leai e sili ona tāua le peritome o le pa'u o le tino.

O le matuiā ma le ogaoga o finauga nei, ua manatu ai nisi o tagata, e leai se Atua. O mea uma lava e tutupu, e mafua mai i le malosi o le mafaufau. E leai se isi malosi i tua atu o ia mea. Fa'ata'ita'iga: e malosi le tagata ona o le malosi o le tausami po'o le lava o le malōlōga. O lona uiga, e lē maua se malosi i lou tatalo ma lou fa'atuatua i le Atua. Afai e te ma'i, e maua lou malosi i le foma'i po'o fuala'au, ae le o le Atua. O ituaiga fete'ena'iga ia o talitonuga ua fai ma fa'alavelave i tagata Kerisiano po'o le fea sa'o.

Peita'i, o le tala ua o'o ane iā Paulo e pei ona fa'ailoa ane e Epāfara, o lo'o va'aia pea le fua o le ola fa'atuatua o tagata. O le tusi atu o Paulo, o se fa'amalosia ina ia tumau pea i a'oa'oga Kerisiano e pei ona a'oa'o atu e Epāfara iā i latou. O lo'o tomua le tusi i upu fa'afetai a Paulo, mo le 'au Kerisiano, ona o le loto tetele ma le onosa'i e tutumau ai i le Tala Lelei iā Iesu Keriso, e ui i le tele o fete'ena'iga e pei ona

ta’ua. O le fa’afetai a Paulo e afua mai i galuega fa’atino, o lo’o iloa manino ai le ola fa’atuatua o tagata e pei ona ta’ua e Epāfara(f4), o lo’o ta’ua ai le alolofa o le ‘au fa’atuatua i le ‘au pa’ia. O le ‘au pa’ia, e fa’asino i auauna a le Atua. E iai mea taua ia e ta’ua e Paulo e tāua foi lo tatou iloa:

1. O le malosi po’o le mana o le tatalo mo isi (f3). O lo’o ta’ua ai e Paulo talosaga mo le Ekalesia i Kolose. E lē taumate, o nei tagata Kerisiano aemaise o fa’afitauli e pei ona ta’ua. O lea la ua o’o ane le tala fiafia, o le pine fa’amaui lea o le mana o le tatalo mo isi.
2. O galuega e faia ona o le fa’atuatua i fa’amanuiaga mai le Atua (f: 4 – 6). O lo’o ta’ua ai galuega lelei o lo’o faia e nei Kerisiano mo le ‘au pa’ia, po’o auauna a le Atua. O galuega o lo’o molimau Paulo e afua ona o le fa’amoemoe ua teu mo i latou i le lagi. E tasi lava le fa’amoemoe e pei ona a’oa’oina ai i tatou tupulaga, o le ola e fa’avavau.. O le fa’amoemoe lea ua fai ma fesoasoani tele i le loto fa’atuatua o le tagata.

Tupulaga, o fa’afitauli ia e feagai ma tagata Kerisiano i Kolose., e tutusa lelei pe foliga tutusa foi ma fa’afitauli ia tatou te feagai i aso nei. O i tatou o lumana’i o aiga, o nu’u ma Ekalesia ma le atunu’u. Ae fa’amoemoe le manuia po’o le lē manuia o le lumana’i i filifiliga ma fa’ai’uga tatou te faia. Ia tatou filifili e auauna i le Atua soifua i le taimi nei, ona mautinoa lea e manuia ma sologa lelei le lumana’i. O le soifu’aga e aga’i pea i luma. E tele foi suiga ua tatou va’aia i nei aso, ua afaina ai foi ma amio a tupulaga. O suiga e lelei, ae a so’ona fai ma fa’aaoga sesē, ona leaga lea. O le fa’amanatu o lenei aso, ia loto fa’afetai ma fua mai. Tatou lagona le loto fa’afetai i le Atua, ona o lona alofa ma lona agalelei ia i tatou i mea lelei uma. Tatou fa’afeta’ia pea le fa’aolataga na ia saunia e ala i le soifua o Iesu Keriso. Ia tatou faia o mea lelei, o ‘au’aunaga ma fa’atinoga e vi’ia ai lona suafa e lē aunoa. Ia avea o tatou olaga o se la’au e fua mai i fua lelei mo le vi’iga o le Atua.

1. O a ni fa’afitauli o tupulaga i aso nei ua lē fua mai ai i ni fua lelei o latou olaga?
2. Se mea lelei se tama ma se teine talavou ae fa’atonu so’o lana amio ia lelei ia vi’ia ai le Atua?
3. Fai se lisi o fua lelei ma fua leaga o le olaga, ona fefa’asoa’ai lea ta’ito’alua ma apoapoa’i le isi i le isi i le amiolelei e ao ina fai.

MANUIA TELE LE AFIAFI

////////////////////////////////////

ASO SA – NOVEMA 29, 2026 “FA’ATALATALANOAGA I LE TUSI PAIA” (Aso Sa muamua Ativeni)

MATAUPU – “E LE UMA I LE OTI LE ALOFA FA’AMAONI”

TUSI FAITAU – RUTA – 1: 1 - 22

FA’ATOMUAGA –

Ua silafia e tupulaga ma fanau le tala iā Ruta, ua iloa foi le a’ano o le tala, o le alofa lē solomuli o Ruta i le tinā o lana tane. Ua manino i i le tāua pea o le fa’ata’ita’iga o le alofa fa’amaoni o lo’o ta’uta’ua ai Ruta. Peita’i, ua manatu foi ia sili ona iloa e tupulaga ma fanau le tasi fa’ata’ita’iga o le alofa fa’amaoni o Ruta, lea ua ta’ua i’inei – ***e lē uma i le oti le alofa fa’amaoni.***

FESOASOANI MO LE MATAUPU;

Ua lauiloa Ruta i le alofa fa'amaoni e tau i le oti. Ae o lo'o fa'aalia foi i le alofa o Ruta le isi mea matagofie e tatau ona a'oa'oina ai so'o se tagata fa'atuatua fa'amaoni i le Atua. – ***O le alofa e tumau pea i tala atu o le oti.*** E mafai foi ona fa'apea - ***e lē uma i le oti le alofa.***

Ua oti le tama a Naomi na tatau ai ona alofa fa'amaoni Ruta iā Naomi. Ae fai mai le tala, ua atili ai ona alofa fa'amaoni o ia i le tinā o lana tane, ina ua oti lana tane. Aiseā? Ona e le uma i le oti le alofa fa'amaoni o Ruta. Ua oti lona to'alua sa fanau mai i le olaga e tausia lona tinā. A o lea ua filifili Ruta e fa'aauau e ia le tausiga o le tinā o lona to'alua. E lautele ma loloto le alofa o Ruta. E lē na o le tama a Naomi na la nonofo na alofa i ai. E aofia ai foi ma lona tinā. O le ituaiga alofa lea e lē uma i le oti. O le alofa e fa'avavau. Ma o le alofa fa'ale- Atua . E leitia ui mai le gafa o le Alo o le Atua i le tamaita'i o Ruta. O Ruta na fanau mai ai Opetā lea na tupuga mai ai lese, le tamā o le tupu o Tavita, le tupu o Isaraelu, a'o Iesu Keriso e tala lona gafa tau tupu ma tau atu Isaraelu i le aiga tupu o Tavita. (Faitau le gafa o Iesu i le Mataio 10. Fai mai le gafa a Mataio, o Iesu Keriso o le atalii o Tavita, o le atalii foi o Aperā'amo (Mataio – 1: 1). O Iesu Keriso foi o le Mesia mai le ituaiga o luta lea na tupuga mai ai tupu'aga o le tupu o Tavita.

TOE MANATU:

Mo tupulaga, o le fa'avae po o le fauina o tatou olaga ina ia mafai ona alolofa e pei o Ruta. O le upu a le toeaina Aposetolo o Ioane – ***a fai lava le alofa, ua fai lava mea lelei uma.*** (When love is done, all is done). O le tagata alofa, o le tagata o le fa'avavau, ma e sao atu i le ola e fa'avavau. Ia le pei tupulaga o nisi tagata e oti loa le to'alua uma loa le alofa i le aiga o lona to'alua. A tumau le alofa i le tagata, e aumai lava e le Atua fa'amanuiaga e fa'amalieina ai o tatou mana'o i mea lelei uma. Ua tumu le olaga i tagata e fa'atagilā alofa. E ala ona alofa ona o lo'o maua mai ai mea o lo'o mana'o i ai. E lē fa'apena le alofa fa'ale- Atua, e finagalo ai le Atua mo le tagata. Ia alofa ona o le tiute e tatau ona fai. Ia alofa ona o le finagalo pa'ia o le Atua. Ia alofa ona o le fiefia e alofa, o le fa'aaogaina tonu o le ola ma le malosia. Ia alofa foi, ona o le mata'u ma ava i le Atua, ma le tauiviga ia foliga le amio i le Atua. Tupulaga, e leai se aogā o mea lelei uma e maua e le tagata, pe a lē i ai ma le loto e fa'aaoga ai fa'amanuiaga ua maua mo le lelei o nisi tagata. E le'i uma i le oti le alofa o Ruta, ae na atili ai ona alofa fa'amaoni e tau i le oti. O Ruta lena ua mana'omia i aso nei.

FA'ASOA FA'ATASI FA'ALAUATELE I LE MATAUPU

1. O le a sou manatu le tama ma le teine talavou i le upu ua ta'ua – ***a fai a le alofa, ua fai foi mea lelei uma.***
2. E fa'apefea ona e fa'amatalaina le uiga o upu ia, e lē uma i le oti le alofa fa'ale- Atua e pei ona fa'aalia e Ruta? Fa'amata e mafai ona e fa'atinoina ma ola ai?
3. O le a se a'oa'oga tāua ma se fe'au mo oe le tama ma le teine talavou o aso nei, mai lenei mataupu?
4. O le a sou sao i le fa'aauauina o lenei alofa ua manaomia ai oe i aso nei?
5. O fea ni vaipanoa o le olaga o lo'o e maitauina ua mana'omia ai le alofa lea? O lea sau mea e fai iai?

Manuia le fetufaaiga, malo le onosai

////////////////////////////////////

ASO SA – TESEMA 06, 2026. “FA’ATALATALANOAGA”

MATAUPU – “O LE FA’ALILIUGA SILISILI ESE A LE AtUA”

TUSI FAITAU – ISAIA – 7:10 - 14

FESOASOA MO LE MATAUPU:

Manatu lava e fa’apu’upu’u le fa’asoa o lenei afiafi, auā o lea foi ua tatou tapena mo le fanau mai o le pepe o le Kerisimasi. E lē o se mea fou lenei vaitau, peita’i, e leai se taimi tatou te fa’apea ane ai ua tuai pe lē aoga feau mo lenei vaitau, auā e fou pea afioga a le Alii. O le talanoaga ma tupulaga ma fa’aali mafauauga ma manatu i le tasi lenei vaega tele o le afio mai o Iesu i le lalolagi. ***Ua ou ta’ua i’inei o se faaliliuga aupito silisili ese lea a le Atua ua tupu i le talafa’asolopito o le lalolagi.*** O le galuega fa’aliliu aupito ofoofogi ma silisili ese ua faia e le Atua, o lea tatou te va’ava’ai atu i ai i le tau lenei o le afio mai. O le natura o le Atua ua fa’aliliu e avea ma tagata. O uiga uma o le Atua o lo’o i ai i’ina, i le auala e aupito sili ona faigofie ona tatou malamalama ai, auā na faia lava e le Atua le tagata i lona fa’atusa. A’o le pepe lea e fanau i le Kerisimasi, o le Atua lea. Ua manatu ai i lenei afiafi tatou te fa’asoa ma sailiili atili pea i mea na tutupu o lo’o si’omia ai lenei fa’aliliuga silisili ese ma fa’aali i ai mafauauga o le ‘Aualavou.

Na fa’aaoga muamua e le Atua le fa’ailoga o le pepe. Na osofa’ia le tupu o A’asa ma le malo o luta e tupu o Arama ma le malo o Isaraelu, ona ‘auina lea e le Atua o Isaia e ta’u ia A’asa o ona fili o le a fa’atoilaloina. Na fetalai le Atua iā A’asa e ala atu iā Isaia, ina ia fesili atu mo se fa’aailoga e fa’amaonia ai upu a le perofeta, ae na lagona e A’asa le fa’amaulalo. Ou te le fai atu lava, ou te lē fa’a’ono’ono i le Alii (f: 12). O le tali a Isaia (f: 13). A e a pe a se’i fai ia le mea ua fa’atonu atu e fai mo si nei taimi e tasi. Na avatu pea lava e le Atua le fa’aailoga ia te ia. Fa’auta, e to le taupou, ma fanau mai se tama tane e te fa’aigoa foi ia te ia o Emanuelu (f: 14). E toe ta’ua le igoa o Emanuelu i le Mataio - 1: 23, o lo’o si’itia mai ai le mau mai ia Isaia, ma tu’uina mai lona uiga, **o le fa’aliliuga sili lea o le Atua ua ia tatou. O EMANUELU.**

FA’ATINOAGA O LE MATAUPU:

1. Ia sailiili ma su’esu’e I le Tusi Paia, ona fa’aali lea o mafauauga o le tupulaga e fa’atatau i le mataupu, fa’asoa ma fa’amalamalama nisi o latou taofi.
2. O le a se a’oa’oga o le a mafai ona maua e tama ma teine mai lenei mataupu?
3. Ia tata’i pea le fa’aaliga mafauauga o tupulaga i le fa’aliliuga e le Atua o ia lava e ala ia Iesu Keriso, ua ia i tatou?

MANUIA LE FAAALIGA MAFAUFAUGA

////////////////////////////////////

ASO SA - TESEMA 13, 2026 “TAPENAGA MO LE KERISIMASI MA LE TAUSAGA FOU”

FA’AALIGA TAU:

Malo le folau, malo le onosa'i. O lea lava ua tatou o'o mai i le fa'ai'uga o galuega o lenei foi tausaga. Ua tatou sauni e fa'atili foe mo le a'e. E le uma ai le agaga fa'afetai i le Atua, ona o galuega o lenei tausaga o le a tali mavae, aemaise lava i a tatou mataupu sa feagai ai i saililiga ma su'esu'ega i le Tusi Paia. Faafetai tele le galulue malo le fa'atoatoa.

Ua manatu foi e taua foi tapenaga mo le fa'ai'uga o lenei tausaga e pei ona tatou masani ai. O le ala lea ua manatu ai o le a tu'uina atu Aso Sa o totoe e tapena ai Autalavou mo le Kerisimasi ma le tausaga fou. Ta'oto atu pea i 'Autalavou ma Aoga Aso Sa i tapenaga talafegai mo ia aso. E lē afaina foi ae fa'aaogaina pea ni fa'asoa sa o tatou fa'asoa ai i lenei tausaga atoa, e fafau ai se tapenaga 'anoa mo le fa'amanatuina o ia aso tāua. Pule outou i le faiga o fa'atinoga, pe fa'atuvaga pe tapena fa'atasi mo la outou 'aulotu.

Manuia tele tapenaga uma, ma ia mafuta pea le Agaga o le Alii i fuafua'aga uma e tau ai i manū fa'amoemoeega.

Matou te fa'amanuia atu le Kerisimasi ma le tausaga fou, iā outou Susuga i Toeaiina ma Faletua, Susuga i Fa'afegaiga ma Faletua, Faiaoga ma Ofisas o Autalavou uma a le EFKAS, aemaia o fanau ma tupulaga. Matou alolofa tele atu ma ia manuia le Kerisimasi ma le Tausaga fou – 2026.

MANUIA LE TU'UAGA MA MALOLOGA O LE KERISIMASI MA LE TAUSAGA FOU. TATOU FEILOA I LE – 2027.

////////////////////////////////////



Tautua Printing Press
1 Kanana Fou St, P.O. Box 1537
Kanana Fou, American Samoa 96799
(684) 699-9810
<https://efkas.org>